



**2021-imut aningaasanut inatsisissatut siunnersuut.**

(Aningaasaqarnermut Naalakkersuisoq)

(Aappassaaneerneqarnera)

Siullermik Aningaasaqarnermut- Akileraartarnermullu ataatsimiititaliami 2021-imut aningaasanut inatsisissap aappassaaniinginnerani suleqatigiilluarsimanitsinnut qujarusuppunga. Partiit akimorlugit suleqatigiilluarpugut isumaqatigiinnartanngikkaluarlutalu, amerlanertigut inerniliisinnaasarsimavugut, aningaasanut inatsisissap suliarinerani tamatsinnut naammagisimaarnartumik.

Aningaasaqarnermut Naalakkersuisoq aamma qutsavigerusuppara piareersimajuannartarneranut, ataatsimiititaliaq apeqquteqarlunilu piumasaaqateqaraangat. Suli naammassinngilagut, sulilu piffissaq atorallassuarput, oqimaaqatigiittumik ukiuni sisamani atuuttussamik aningaasanut inatsisissap piareernissaanut. Kissaatigisaq ataatsimiititaliap tamarmiusup isumaqatigiissutigisaa.

Aningaasanut inatsit, ukiut sisamat ingerlaneranni oqimaaqatigiittussaq, sakkortuunik pingaarnersiuiinernik piumasaaqatitalik. Aningaasanut inatsisip pingajussaaniinginnerani tamanna angussagutsigu sapiissuseqartariaqarpugut taakkuninnga isummernissanut – aamma ilisimagaluarlugu aaliangikkat ilai nuannarineqarnaviangitsut.

Maannakkut uani inissisimavugut nappaatip annertuumik tuniluuttup qaqugukkulluunniit eqqorsinnaalluta. Maannamut iluatsitsilluarsimavugut. Mani nunami tunillatsissimasut tamarmik peqqissisimapput, tuniluunnerlu siaruaassimangilaq, inuit sapinngisartik malillugu, oqartussat innersuussutaannik malinnimmata.

Tuniluunneq Peqqinnissaqarfitsinnut kingunerlorujussuarsinnaavoq, aammali aningaasaqarniarnitsinnut. Takoreerparput upernaag matusinerup kingorna nunami inuussutissarsiornerup qanoq eqqugaatigisimanera. Killeqarfiit matusimapput tamassumalu kingunerisaanik takornariaqarnermut eqquinerlussimalluni. Taassuma kinguningua aalisakkat akii, nunatta nappatigisaat, appariartulerput.

Taakku pissutaapput Nunatta karsiata missigersuutigineqartutut isertitassaraluani pinngitsoormagit, allatullu ajornartumik ikiorsiissutinik pilersitsisariaqarsimavugut piffissami imaannaangitsumi inuussutissarsiutillit ikiorserniarlugit.

Naalakkersuisut ilimasaaripput 2020-imi 500 million koruuninit amigartooruteqarnissamik. Taassuma qanorluunniit aarlerinartoqarnera takuttitariaqaraluarpa. Tunillaassornermik sulii eqqorneqanngilagut, taamaakkaluartorli aningaasatigut annertuumik eqqorneqarpugut. Taannaliuna aamma pissutaaqataasoq, Demokraatit ukiut sisamat ingerlaneranni Aningaasanut inatsisip oqimaaqatigiinnissaanik piumasaaqamminnik aaliangiusimanninnerannut. Allattut ajornartumik sipaartariaqarpugut siunnersuutit



anigaasartuutaasussat nutaat igalassimaartillugit aningaasaqarnermullu aqutsinermut akisussaassusermik takutitsilluta. Aappaaguinnaanngitsoq, aammali siunissami, qulakkeernissaata tungaanut, ajornartoornerup taassuma nukittunerulluta misilittagaqarnerullutalu qaangernissaanut.

Tamakkuuku ilanngullugit Demokraatit isumaqatigiinninniarnermut peqataasut, taamaattumillu aamma uagut tungitsinniit aningaasartuutaasussat siunnersuutini annertuppata annikkipataluunniit takusaqanngitsusi. Naalakkersuisooqatigiinnermut isumaqatigiissutitta saqqaani allassimavoq, SIUARIARTORNEQ, PATAJAASSUSEQ TOQQISSISIMANERLU – tassa pingaartit taakku pingasut aallaavigalugit Aningaasanut inatsisip suliarineqarnerani eqqarsaatigisariaqartut.

Aningaasanut inatsimmut aningaasartuutaasussanik annertuunik piumasaqarutta patajaatsumik toqqissisimasumillu takutitsissanerpugut ilisimalluinnarlugu Ataatsimiititaliap ISUMAQATIGIISSUP Aningaasanut inatsisip oqimaaqatigiissuunissaa piumasarigaa? Taamatut Demokraatinit uagut isumaqanngilagut.

Politikkikkut angusat, naalakkersuisooqatigiinnut tapertaasutut kingusinnerusukkullu naalakkersueqataasutut pilersissimasagut isumalluarfigaavut, ineriartornermik kinguneqarumaarput, naak immaqa Corona uaneralaannguamiikkaluartoq.

Aningaasaqarnermut politikki ingerlanneqartoq, aningaasartuutissanut eqqummaarinneq sipaggarinnerlu ukkataralugit, aaliangiusimaneqassaaq. Pisariaqartunik piareersimanissaq pisariaqartinneqarpoq, Nunatta Karsia kommunillu aningaasaqarniarnerat qaqugukkulluunniit COVID-19 ajornartoortitsineranik aqutsisinnaaqullugit.

Inuiaqatigiit aningaasaqarniarnerat unissanngilaq, taamaattumillu naalakkersuisooqatigiit nunap immikkoortuini tamani suliffissaqarnerup suliniuteqarnerullu attatiinnarnissaanut pisariaqartumik suliniuteqarnissaq qulakkeerusullugu, taamaattumik aningaasaliissutit sapinngisaq malillugu oqimaaqatigiittut siammarneqassapput.

Mittarfissanut pilersaarutit ingerlanneqaleruttorput, naatsorsuutigilluinnarparpullu Qaqortumi mittarfissaq aamma aallartinneqassasoq. Piginneqatigiiffiit akileraarutaat 5 procentpointimik appartissimavarput. Aallarniutaavoq, kissaatigaluarparpullu suli apparteqqinneqarnissaa akissaqartinneqalerpat. Sulinermit ilanngaat eqqussimavarput suliffeqarluni aningaasatigut pilerinarnerulernissaa anguniarlugu. 2021 aamma ukiuussaaq aqqissuusseqqinnerit aallartissimasatta piviusunngorfissaat.

Inuiaqatigiit ineriartornerannut tamatta akisussaaqataasariaqarpugut, pingaartumik COVID-19-ip ajornartoortitsinerani pisariaqarpoq ataatsimoornissarput.

Aningaasaqarnermut- akileraartarnermullu ataatsimiititaliap Uummannami missigersersuutit pillugit isumasioqatigiinnerani Aningaasaqarnermut Naalakkersuisumut allattaqattaarput Aningaasanut inatsisip oqimaaqatigiissup pilersinnissaanut suliniarneq pillugu. Oqaloqatigiinneq taanna imminut naatsorsuutigeqatigiinnermik aallaaveqarsimavoq. Naatsorsuutigisat immaqa illuatungeriinnik piviusunngortissallugit ajornakusoorsimasut.



Aningaasaqarnermut Naalakkersuisoq isumasioqatigiinnermi nalunaarutigaa, aningaasat tigoriaannaat ima annertutigisumik appariarsimangitsut, ukiup aallartinnerani annilaangassutigineqartumit, aammalu akileraarutigut isertitat apparnerigaluat aaqqeqqissimasut, kisiannili suli akornguserneqartut aalisakkaat – ingammik raajat akiisa annertooujussuarmik apparnerisigut. Nunatta karsia isertitassatut missiliuutaasutut pitsanngoriartinneqarsimavoq 77,2 millionit koruuninik 2021-imi aammalu 92,8 millionit koruuninik ukiut sisamat ingerlaneranni naatsorsuutigineqartutut. Tamanna nuannaarutigaarput. Taakku saniatigut sullissinissamik isumaqatigiissutit pilersinneqaqqammersut pisortanut 53,7 millionit koruuninik sipaarutaassapput. Tamakkuli tamaasa ilanngukkaanni, suli 139,9 millionit koruuninik ukiut sisamat ingerlaneranni nassaarniartariaqarpugut, oqimaaqatigiisitsineq angussagutsigu.

Aningaasaqarnermut Naalakkersuisup isumasioqatigiinneq naggaserlugu Aningaasaqarnermut-akileraartarnermullu ataatsimiititaliamut kajumissaarivoq, siunnersuutinik tigussaasunik missigersuutip anguneqarnissaanut siunnersuuteqartoqaqqullugu. Tamanna isumaliuutissiisumi ersinngilaq Naalakkersuisumit kissaatigineqarsimagaluartoq. Isumaqaarpunga naleqqutiinnartoq ataatsimiititaliap aamma suliniuteqarnissaa, piumasaqaatit taama annertutigitillugit, neriuppungalu, ataatsimiititaliap tungaaniit Aningaasanut inatsisip pingajussaaneerneqannginnerani tapersiinissatsinnut angumersisinnaassalluta.

Aningaasaqarnermut ataatsimiititaliap toqqarsimavaa missigersuusiornermut tunngasumik isumasioqatigiinnitsinni apeqqutigineqartut nassiutissanagit ataatsimiititaliap ataatsimiinnerani kissaatigineqartut Aningaasanut inatsimmut kukkunersioriikkat tiguneqareernissaanut. Taassuma tungaanut tamanna suli angusimangilarput. Taamaattumik Aningaasaqarnermut ataatsimiititaliap toqqarsimavaa apeqqutit novembarip aallartinnerani nassiutissallugit, siunnersuutip aappassaaneerneqannginnerani akissutinik tigusaqarsinnaaniassagatta. Qilanaarpugut siunnersuutip aappassaaneerneqannginnerani suliareqqinnerani akissutit taakku tigunissaannut. Qilanaarpugullu Aningaasanut inatsisip pingajussaaneerneqannginnerani suleqqilaarnissatsinni akissutit taakku ilanngunnissaannut. Qanoq kinguneqassanersut suli ilisimangilara.

Pingaartuuvoq, qulakkiissagipput, inuiaqatigiit sipaarutaasussanut sunnertippallaannginnissaat, pingaartitsinnik innarliillutik, aammalu 2021-ip kingorna suli pisortat suliffeqarfii ingerlalluartut pigissagivut. Allaffeqarfimmi sipaaruteqaqqissagutta una pissutaassaaq sipaaruteqarnissatsinut akissaqartugut. Sipaarniaannarluni sipaaruteqarneq naggataatigut kinguneqarsinnaavoq, Inatsisartuninngaannit piumasaqaateqartugut pitsaassutsip kissaatigisatsit, apparneranik. Uani mianersuutigissavarput, immitsinnut aaginnannginnissarput.

Uagut Demokraatini upperilluinnarparput Naalakkersuisuni ilaasortat tamarmik annertuumik suliaqartut akisussaaffigisamik annertusiartorlutillu ineriartornissaannik. Angusat annertusinissaat pisariaqarpoq. Atortussiassanut tunngatillugu aatsaat taama angusanik tigussaasunik peqalernissatsinnut ullumikkut qanitsigaagut, nunanullu allanut immikkoortortaqaarfiup isumaqatigiissutit nutaat pilersinneratigut qularutiginnigilluinnarparput, nunatsinnut aningaasaliinernik isertitanillu annertunerusunik kinguneqarumaartut.



Siunissami qaamasoqarpoq, isertitaajumaartussali suli missigersuutigisinnaanngilagut isumaqatigiissutit tamarmik inissinneqartinnagit. Taamaattumik pingaartuuvoq, sammiviup taassuma aaliangiusimanissaa, uagullu Demokraatinit siuttuuffigerusupparput.

Demokraatiniit Aningaasanut inatsisip pingajussaaneernissaa sioqqullugu isumaqatigiinninniarnissanut qilanaarpugut, neriullutalu isumaqatigiissinnaajumaarluta.

Tamakku oqaatigalugit Aningaasanut Inatsimmut allannguutissatut siunnersuutit suliniaqqinnerillu pinginneranni oqallilluarnissaq qilanaaraarput.